



桂勝序

桂勝序



粵自神禹鑄鼎象

山川載在職方者蓋詳矣哉然

其大者固按牒可攷若阻遠幽

宵或闕眺所未及即書不具載

載不加詳而山川之勝槩與夫

往哲之芳蹟往往幾于堊滅希

縱方外者恒三竊嘆云余不佞

性耽幽癖每見一泉一石輒戀
戀不能舍去殆自幼已然比筮
仕雲江躬繫簿書不遑遊覽即
青原之勝未遂登臨迄今不無
悵想後繇省垣出參浙藩總儲
務公署即倚吳山下時邀客飛
觴得快心于十景之巔尋遷右
轄入閩則與武夷君為莫逆凡

三徜徉於九曲迨致江右政歸
偕同年王敬美遨遊匡廬尋鹿
洞天池之勝再信而行自是得
反初服回思寓內奇觀浙曰吳
山閩曰武夷楚曰匡廬景勝甲
天下余宦轍所經具得託足遊
覽而其間峙者流者幽者怪者
收填曾次庶幾乎夙願可償既

歸田暇豫闢百畝之園為頤庸
之所邑故多奇石手自揀選平
地為山隨意區畫名曰卷石小
境盤桓終日自適其天容與將
九載偶於夢寐中神遊攀岩陟
巘非生平所覩又或夢有餽奇
石盈庭堪賞既寤直以夢視之
未幾奉

詔起西川捫參歷井鳥道天梯歷經
艱險及入粵見風洞華景諸巖
佳勝寰中罕儔又

靖藩諸王孫間以奇石相遺恍若
往日夢中景象因公餘周覽桂
林之勝陟降巒巖溯洄洲嶼靡
匪奇邁其勝以山計者曰獨秀
曰灘曰雉曰南溪曰伏波之類

凡十有八以川計者曰灘江曰陽江曰南溪曰彈丸曰訾家洲之類不一而足且磨崖鐫字皆古名人詩賦其上每臨眺間則簇峯澄練與目謀松莖澗瀨與耳謀而詩篆之幽麗奇絕者又與心謀色色象象總命曰山川之勝而叢聚于桂林即吳山武夷匡廬當不少讓顧彼三勝者炳炳圖志中而桂獨無有竊為山靈怏怏因別駕張君羽王素稱博雅且世居灘山下為山川主人與余有舊誼相過遂以志屬焉君遜謝不能因諷以有勝如此不如無有之語又請為君供副墨之需而藩使管君世臣

徐君君羽復從史焉君於是旁
搜傳採援古質今凡諸山之嶺
峴諸川之邈絕及數百年之古
文遺事郡國政績文獻流寓彙
摩編成帙凡二十有四卷前十
六卷為桂勝志勝槩也後八卷
為桂故志故實也二志作而山
川之幽僻古蹟之幾于沉晦者

至是悉顯直與吳山武夷匡廬
諸志相彪炳俾宦遊萃土者得
按圖攬勝則勝輿志合見與聞
合幽懷益暢而詠賦益增即未
涉足于桂者亦展卷瞭然如指
諸掌而山川藉是永有聞于四
方矣張君之功甚偉而不佞之
幽癖及夢所感徵庶不孤哉庶

不孤哉是可為桂之山川賀矣
余因命臨桂何令太庚授之劄
刷氏以廣其傳云 晉

萬曆庚寅孟春之吉

欽差總督兩廣軍務兼理糧餉帶管

鹽法兼巡撫廣東地方兵部右

侍郎兼都察院右僉都御史中

都節齋劉繼文撰



嘗讀柳子厚訾家洲記稱桂林多靈

山拔地峭起林立四野意欣然嚮之

顧去松數千餘里欲一登眺無繇也

萬曆己丑夏會余奉

命填撫西陲道衡湘入桂林驟見石峯

交立雲表左顧右盼令人輻輳久迺

知郭以內為獨秀疊綵華景諸山其

外則栖霞彈丸龍隱峙其左隱山西

峯中隱踞其右又伏波灘雉旁跨江
水水則灘陽二江會於灘山沕滴南
湊以入海而訾家洲寔為之襟喉此
其大觀也余未遑周覽即一二所覩
記峯巒銳者筆聳劒植稍有起伏或
旆而麾或几而憑又或列甌可炊或
端笏以謁其平者屏倚幕張詭麗非
一中有巖洞或堂或室或闕或閣乳
疑苔繡諸石駢附者又千態萬狀尚
訝子厚所稱為未備云且海內名山
稱鉅麗者豈少哉然皆數峯而止迺
桂城內外不出數里而玉笋瑤簪森
列若此抑又奇矣先是督府大司馬
節齋劉公游而樂之謂勝槩不可無
紀因張君羽王博雅能文且世家灘
山麓遂以屬筆張君於是原本山川

采輯題咏為桂勝又因桂勝撫拾前
聞補苴遺事而桂故作焉蓋志形勝
所以表山川而志故實所以徵形勝
他無關於形勝者不與也故桂勝出
則不出戶而可以神遊桂故出即未
暇咨詢一展卷而其人與事瞭然在
目其有功於山川甚偉非徒備野史
已也書成司馬公既序而付之梓謂

余乃山川主人宜序諸末或有進言
于余者曰粵西岩穴即荒州下邑往
往多奇絕匪直桂也顧采阻幽遐非
遊人墨客所能至而其鄉之人又無
如張君者可以表揚之以故聖域弗
彰今桂之勝得司馬公而著聞山川
顯晦信非偶矣余不其然山川鍾秀
效靈不以時間又安知繼今來不有

探奇好古如司馬公搦管能文如羽
王氏者出以續全省之勝以補文獻
之遺豈不尤偉也哉此亦司馬公意
也余請注目以踈昔
萬曆庚寅清和穀旦

欽差巡撫廣西地方都察院右副都御

史前兵科都給事中侍

經筵官華亭蔡汝賢撰



桂勝序

右司馬蕪中丞兩廣督府靈璧劉公去歲冬
初東下裝嚴過故吏張子語之曰自不穀有
事於四方見所在一泉一石粗足寓目其人
莫不有志記用表厥勝乃雲峰煙澗叅錯如
繡如子桂者顧反獨無有勝如此不如無有
子山中八盞圖諸語訖驚起謝不能具白今
南都大司馬連江吳公按浙侍御華容蔡公
先後見屬一如今指皆固謝已之公咲謂曰

子云不能惡乎在對曰地勝固爾抑人也殊
勝桂雖乏人擁朱輪乘獨輶迭往迭來豈乏
四方之英雋乎撫有山川以其餘閒或陟在
巘或降在原亦或汎川溯洄洲嶼或撫景以
興詠或紀遊以見名山川藉之故永有聞此
豈非殊勝耶不此志記焉得勝公曰然又曰
日不穀家居嘗夢入山睹山四壁徧有題刻
子今言與夢合顧曰不能得無慮杪榻不給
故耶不穀是任慎勿讓明日公果遣麾下四
出蒐致比臨發授意藩使鄧管公為過申命
更選杪者俾益具錄既又以一人領衆山不
勝其書檄縣行視亟議以濟居無何叅藩雲
間徐公以代行藩事至陸續杪榻十得六七
書亦草具四五叅藩公聞之以暑著書時枉
勞苦又屬縣以增廣未備縣令南海何君奉
檄唯謹選諸生稽古者挾榻工與俱廩從優
厚於是崢嶸之杪邈絕之濱人爭猿攀鳥集
齋楮墨以往數百年之古文遺事出布人間

張子既幸驟得未睹又辱公近檄府給以筆
札叅藩公間日趣取草親為校定府丞呂君
與諸大夫亦間過視雖則不敏敢不厲志況
前被公激發以有勝如此不如無有之語哉
書凡十六卷因名桂勝所為卷第以先奉公
授獨秀諸榻本家灘山下日就手寫所得次
之餘悉按抄榻至者之先後以為卷第外桂
故八卷用輔以行其意亦具桂故序中
萬曆己丑秋七月朔灘山人張鳴鳳序

桂勝目錄

獨秀山第一

灘山第二

雉山第三

南溪山第四

伏波山第五

七星山第六

龍隱山第七

屏風山第八

疊綵山第九

寶積山第十

隱山及附見潜洞山西山第十

中隱山第十二

清秀山第十三

虞山第十四

堯山及附見諸山第十五

灘江及陽江諸水第十六

桂勝第一卷

始安灘山人張鳴鳳論次

獨秀山

踞城稍東凝秀獨出頗與衆山遠故曰獨秀
國初考卜其陽為

靖江宮殿朱邸四達周垣重迭蒼翠所及皆
禁籞間地以故彤亭畫觀上出雲表下漸清
池最為諸山麗觀焉外人鮮得至者山故刻
有孔子像按圖乃元人所為及見鄭叔齊記

則即山建學自唐已然莫休下時有從事所居似唐以前府治亦在天不巖曰讀書以劉宋時始安太守顏延之著名巖前故有五詠堂鐫顏五君詠風土記云獨秀峰在郭中高聳直上周迴一里餘

虞衡志云讀書巖在獨秀峰下直立郡治後為桂主山傍無坡阜突起千丈有便房石榻石牖如環堵之室

靖江府圖云亭有清樾喜陽拱秀望江臺有凌虛館有中和室有延生軒有可心所有修玄門有擁翠平轟拱辰朝天其上則玄武閣次則觀音堂三官廟山半則靈官及山神祠皆其所禮神處其下有池曰月牙可用汎舟又有樂山探竒瞻雲三處可備清眺穿雲則其將陟巔之道也

詩

六朝宋顏延之

未若獨秀者峩峩郭邑間

顏二句見唐鄭叔齊記中惜未睹其全然
茲山發詠自顏始他蓋未之及故特存之
見經名賢賞異獨秀最先矣

唐張固 孤峯不與衆山儔直入青雲勢未
休會得乾坤融結意擎天一柱在南州

宋沈晦 老鶴下遙天昂昂在林表霜毛臨
野人逸氣秋天杳矯矯顏始安不受剗帶繞
清真自嵇阮一醉萬事了讀書空谷中生芻
白駒皎長哦五君詠極目送飛鳥

呂愿忠 洞口微雲恣卷舒石巖相對一蘧
廬賦才晉宋多夷曠好景古今難宁儲茗盃
已驚浮雲浪齋厨俄聽響鯨魚子雲識字終
何用且讀人間未見書

紹興甲戌三月廿七日知府事呂愿忠訪
顏氏讀書巖淪茗鼓琴裴回久之預者四
人機宜劉襄監郡朱良弼司理葉仁

文

唐監察御史裏行鄭叔齊新開石巖記

城之西北維有山曰獨秀宋顏延之嘗守茲
郡賦詩云未若獨秀者峩峩郭邑間嘉名之得
蓋肇於此不藉不倚不騫不崩臨百雉而峙
立扶重霄而直上仙挹石髓結而為膏神鑿
嵌竇呀而為室巖崑滓可遠幽偏自新勝槩岑
寂人無知者大曆中御史中丞隴西公保鄣
南服三年政成乃考宣尼廟於山下設東西
庠以居胄子備俎豆儀以親釋菜雖峻陟可
尋而叢薄未剪公乃日常從以上每指荒榛
而授事為力無幾得茲穴焉闕而外廉隘以
傍達立則良其背行則躋其腓於是申謀左
右朋進畚鍤壤之可跳者布以增逕石之可
轉者積而就階景未移表則致虛生白矣豈
非天賦其質智詳其用乎何暑往寒襲前人
之畧也譬猶士君子韜迹獨居懿文遊藝不
遇知己發明則蓬蒿向晦畢命淪悟鹽車無
所伸其駿和氏不得成其寶矣篆刻非寵庶
貽後賢建中元年八月廿八日記

宋郡守孫覽五詠堂記

桂林為郡千山

環秀而井邑之內一山峙立狀如冠冕凡州堂臺亭榭開戶相倚清輝可掬玩之無數游者忘歸名曰獨秀山山復有巖可容十許人蕭爽虛涼坐却煩暑宋顏延年出守是邦來游巖間讀書為文以自娛名曰讀書巖蓋紀於圖志者其略如此歷大曆中李昌巖為桂管觀察使因建學其下建元間御史裏行鄭叔齊為之記脫落顏延年事而獨載昌巖之

事景平建元相去視今為未久不應頓失其傳觀叔齊文字猥陋非愛奇博古之流亦不能考尋前載也余元祐五年被命承乏於此視事累月聞斯巖名嘉顏延年好尚不凡訪求故迹而荒崖斷石榛莽蕪穢殆不可見乃命寺僧芟夷營葺之創為堂軒以面巖曲而唐人名刻猶有存者因鏡其旁曰顏公讀書巖延年才高性偏放蕩不羈前後見斥於徐羨之劉湛輩不能無怨嘗著五君詠旨味閑

淡推重一時然亦以此取怨當路故又榜其上曰五詠堂五詠雖非延年在桂所為而乃平日自況也并刻之左右嗚乎士之負才不羈而趨世尤踈者其大足以殺身滅宗次或流離困挫不能自保者踵相躡也如延年文采江左以來蓋一二數少與謝靈運齊名辭氣軒揚凌傲當世亦略相似靈運竟以僂死而延年獲免蓋幸矣後之來者遊其巖觀其詩足以想見其平生大槩云

題名

唐刑部員外郎孟簡元和元年三月三日遊宋朝奉郎通判桂州軍州事楊書思政和二年九月晦來

孫覲北歸提點刑獄董莽招經略安撫劉彥適轉運副使陳充轉運判官趙子巖餞於蒙亭飯後登鐵牛寺塔徒步入巖院觀無畫墨老人畫像初寮道人書榜讀書巖所刻五詠晚集於靜寄紹興四年十月十七日

淳熙改元冬常恭曾游

開封王維則拉張信之啜茶巖下山主華公
預焉淳熙十年歲次癸卯七月十九日題

有宋顏公讀書巖六字篆者不書名疑即孫
觀題名內云初寮道人書榜初寮則王安
中所自號不則孫覽之鏡也

又有宋乾道九年蔣時日新所篆雙清室三
字

郡志云有舊刻雪洞二字

灘山人曰環桂諸山以千百計惟獨秀中城
崛起有王公貴人之象焉自前世剖符持節
開府是處今

靖江以同姓諸王建國南中為

明藩屏館宇金碧跨山彌谷盖足當其盛矣
抑尚有可請者曰顏光祿一出守遂以二始
大著郡名至梁之裴邃為始安自稱三始喜
見言論又桂山諸詩造端光祿實在是山請
得以諸繕修餘材即巖構祠比宋五詠堂庶

先政之風不墜本山之韻益光亦一盛舉也
不然盍試觀孫記乎鄭舉其詩尚爾不免曾
謂大國而可不議及此乎當必有請之者

桂勝第一卷

桂勝第二卷

灘山

陽江西來東入灘水魁然起據南臯之端是
為灘山橫障江口引犇瀾東注有北招伏波
南與鬪鷄雉山并力扞江之狀洞曰水月門
出水上其高侔闕夏秋之交移舟入中遊魚
千百瀟灑几席間洞朗潭澈光相映燭濱水
諸巖洞不能及也南溪諸山列戟山陽陽江
餘波出雉山者亦迴合於前故宋提刑方公

信孺卽南壁下建精舍以居曰雲崖軒軒廢已久前邵令君以仁於提刑所鐫詩前建屋署榜曰古雲崖軒因祠范方兩公於中前學憲鄱陽劉公應麒增起廊舍學憲南昌熊公惟學易墻以磚今兩廣督府靈璧劉公繼文復命修飾自是可漸復軒舊觀矣軒左有洞東出曰東暉東有高巖曰南西

風上記云灑山在訾家洲西一名沈水山以其山在水中遂名之故老相傳龍朔中曾降天使投龍於此今每歲旱請雨潭中多有應前政元常侍以其名與昭應驪山音同故遂改為儀山

虞衡志云水月洞在宜山之麓其半枕江刻作大洞門透徹山背頂高數十丈其形正圓望之端整如大月輪江別派流貫洞中踞石弄水如坐捲蓬大橋下

詩

宋方信孺題雲崖軒 不用窮探費杖藜隱

然林壑挾城陴曾尊月洞千巖上更着雲崖
一段奇拂拭軒窓容俎豆發揮泉石借聲詩
瞿曇頗似知人意已約梅花帶雪移

張自明和 萬里風煙倚瘦藜湘南曾自一

登陴雲崖知在宜山麓水月傳千古洞奇四
字丹書無夢見千峰蒼玉有誰詩門前繫馬
松陰下鴉背斜陽影屢移

張孝祥題朝陽巖 空巖目望一牛鳴不要
郵籤報水程天接海光通外徼地連岡勢挾

重城絲綸疊至龍恩重繡斧前驅蠻霧平
閣鸞臺有虛位請君從此振朝纓

又 雞腸得酒作雷鳴痛飲狂歌不自程

上波瀾生健氣歸來鐘鼓動嚴城不應此
泥鴻業盍與吾君致太平伏櫪壯心猶未
煩君為我請長纓

張自明遊朝陽巖 綠野年來喜有秋行春
到處小淹留朝陽亭上初披霧水月巖中更
枕流竹徑不容周俗駕桃溪還泊晉漁舟遊

頭自愧非元老濫揔師干乏壯猶

又乘輶初至憶前秋豈意持麾尚此留立
屋得僧成宴喜遊山如謝欠風流勸酬同把
菊花盞來往自操蓮葉舟向晚洞門煙漸鎖
祇應歸興更夷猶

張栻紀所遊

灘江即湘江澗澗清見石其

東列羣峰秋水碧復碧日出霧露收草徑上
逼側憑欄舒望眼已足慰疇昔更窺巖穴勝
創見為驚惕如何數里間奇觀屢接跡寬同

厦屋深劃若巨靈擘日月逝光景風雲變朝
夕石橋幾年成乳竇一時滴神龍舊隱處仰
視多易辟蛟迹凜猶存隱隱印霜脊下有澄
湫深餘波漱蒼壁往昔已仙去來者此其宅
薄晚叩松關風過聲索索聊麾車騎退容我
且散策却望些言家洲輕舫渡前磧回首煙樹
林已復桂蟾魄宇曠淨餘滓羣物被光澤河
洲寄遐思空巖皎虛白清輝猶可窺水色相
激射天邊與川上亭亭如合璧居然廣寒遊

不用假六翮班坐依微瀾晤賞共佳客與之
想千載詎有今古隔簫鼓歸夜闌觀者燦城
陌往往羅杯竿班班見殺核諒因年歲豐人
意少舒適視爾意少舒於予多忻懌

張自明水月洞 癸水江頭石似浮銀河影
裏月如鈎無人弄杵看蟾兔有客乘槎訪斗
牛自古鵲橋傳七日何年桂子落三秋金輪
待欲長無缺玉斧仍須妙手修

文

張孝祥朝陽亭記

丙戌上巳余與張仲欽

朱元順來游水月洞仲欽酷愛山水之勝至
晚不能去僧了元識公意即其上為亭面山
俯江据登攬之會五月晦余復偕兩賢與郭
道深來水潦方張朝日在牖下凌倒景涼風
四集仲欽欣然舉酒屬余曰茲亭由我而發
盍以銘之余與仲欽頃同官建康盖嘗名其
亭曰朝陽而為之詩非獨以承晨曦之光惟
仲欽之學業足以鳳鳴於天朝也今亭適東

鄉敢獻亭之名亦以朝陽而巖曰朝陽之巖
洞口朝陽之洞元順道深合辭稱善即書巖
石記其所以

張孝祥記

又朝陽巖詩序 往為仲欽賦朝陽亭亭在
建康其詩曰便合朝陽作鳳鳴江亭聊此駐
修程南瞻京洛臨雙闕東望仙家接五城日
上白門兵氣靜春歸淮浦暗潮平遙憐莫府
文書省時下滄浪自濯纓明年余為桂州仲

欽以常叅官十六人薦為廣西提點刑獄公
事又明年余罷去仲欽直秘閣寔代余蓋與
仲欽嘗游朝陽巖而樂之於余之行也仲欽
置酒巖上請佳賓客咸集顧不可以無語乃
賡建康之詩以記余與仲欽事契如此為嶺
表異日之雄觀云

范成大復水月洞銘并序 水月洞剡灘山
之麓梁空踞江春水時至湍流貫之石門正
圓如滿月樣光景穿映望之皎然名賓其實

舊矣近歲或以一時燕私更其號為朝陽邦
人弗從且隱山東洞既曰朝陽矣不應相重
乾道九年秋九月初吉吳人范成大莆田人
林光朝攷古揆宜俾復其舊成大又為之銘
百世之後尚無改也銘曰有嵌孱顏中淙漲
湍水清石寒圓魄在上終古弗爽如月斯望
灘山之英灘江之靈復其嘉名范子作頌勒
於巖從水月之洞

題名

曾布陳倩苗時中劉宗傑齊諶劉誼宋元豐
二年中秋游

淳熙乙未歲中秋日廣漢張敬夫約長樂鄭
少融玉山趙養民同游水東諸巖薄暮自松
關放舟泊水月洞天宇清曠月色佳甚因書
崖壁以紀勝槩

臨江曾宏正崇仁吳湜廬陵楊壽息三山陳
華子羽士李可道同游子公邁公适侍淳熙
癸卯九月望

桐廬詹儀之以淳熙戊申四月辛巳同臨賀
別駕涂四友新欽陽守陳昭嗣前桂林郡文
學陳邕泛舟訪水月洞登訾家洲時亭榭一
新江山改觀懷古攬勝觴詠忘歸後一月辛
酉約幕屬陳邕唐庭堅雷憲憲屬陳東漕屬
黃奕余偁劉三錫來尋盟

延陵吳宗旦宜之新安朱晞顏子困冒雨泛
舟遊朝陽洞以訪水月水色正碧洞月宛然
無異望冰輪於雲峰缺處舉杯酌月迺還紹

熙改元授衣假

舟陽張金以紹熙甲寅正月四日集賓僚廬
陵胡槻相臺王思詠吳門范藻臨川董居誼
新安汪楚材郡人滑懋於報恩寺之脩然亭
食已泛舟龍隱遂過訾家洲訪水月洞登慈
氏閣從容竟日而歸桂林山水之勝冠絕西
南易節此來雖去鄉益遠而公餘登覽心開
目明歸思為之頓釋云

淳熙丙午先公吏部通守是邦戊申春拜欽

陽太守時連帥桐廬詹二卿與先公為道誼交
 不以吏屬視一觴一詠莫不與焉疇累侍膝
 下年未冠今四十五載矣紹定己丑疇自零
 陵守蒙恩再畀節來南登桂嶺四望簪帶宛
 然白雲何在情已不能自勝歲餘幸所部相
 安得以暇日携累輩游水月洞細睨懸崖上
 有詹與先公所識歲月愈愴然於中命成之
 來前曰汝知之乎先公自擢第至二千石歷
 欽貴徽三郡俱有治狀入拜右侍郎輪對論
 中外吏治苟且事玉音嘉獎者數四即下詔
 戒飭未幾持浙西憲節活毗陵京口江陰饑
 民百萬至今人思之蓋先公平昔有言仕官
 無大小食焉必思其報今日能挈汝以游此
 者先訓之力也汝謹毋忘成之拱手曰唯請
 書之紹定庚寅五月朔男朝散大夫廣南西
 路轉運判官疇百拜拂塵孫將仕郎成之秉
 筆

吾閩衣冠甲天下游宦於桂林者一時為盛

經幕三山卓樗子用紹定辛卯菊節會同里
二十有一人同幕趙繇夫仲至林文誠公著
憲幕李遇用之漕幕陳夢庚景長林應辰振
老趙希鄂仲韓薛之鑑明叟奉檄至者郭岳
伯崇陳該一彥博方禹錫文瑞李士煒華國
趙必取世頴王震定東父柯楚伯翹林顥景
程林機次樞鄭公望希呂調銓者陳士吉一
卿趙希璫宗美陳應龍翔卿聯轡湘南登千
山懋簪帶挹棲霞七星之秀薄暮舍策泛舟
由龍隱涉訾洲夷猶水月之下把酒賦詩人
物與衆山俱清情無涯而樂亦無涯也

贛曾原一汴趙希囿淳祐壬子巳盤薄水
月詠南軒遺篇光霽熙然懷哉若人

雲崖二真書旁有佛像下鐫唐僧智深為合
浦令呂興造佛像記

朝陽洞三篆張孝祥書

水月洞三篆谿園居士書 谿園乃宋靜江

倅吳億之別號

灘山人曰山故有遊者鍾春伯范旂叟姓氏
經畧新作郡齋詩亦在其間詩蓋張維諸人
作苔凝水蕩不復可錄又有杜循自記所得
陸游書與詩南宋文名陸生最重然亦剗磨
過半矣曾宏正詞非邁俗故獨存題名乃朱
晞顏師表方顧詞憶歌者何或問范方祠
所起曰余碑中略具之頃讀文穆公論桂山
也曰吾家東南奉使幽薊南宅交廣西至岷
峨之下所經太行常山衡嶽廬阜靡不登覽
乃博大則有之峰巒竒秀舉出桂下雖九華
黃山仙都鴈宕及夔之巫峽亡以過也桂山
宜為天下第一云提刑之注意諸山也其傳
備矣莆文獻志反訾其歸營所居於鄉之巖
以為癖非戀戀諸勝故耶又不特銘水月軒
雲崖已也何可無祠以奉厥志况兩公往皆
見德於士民乎或又問諸山志古此獨變文
何夫祠有章往勸來之義焉非若倚山而亭
臨川而閣徒恣賞於泉石寄情於雲煙以自

適其適也其義正故其指顯變例而志諸公
之舉祠何郵之有

桂勝第二卷

桂勝第三卷

雉山

山東北麓下款江水其上側起有昂首欲飛
之執名或因之昔人遂以白雉聞僧顯誦經
事附之山山在濼山南溪諸山間往城南虹
橋未築時濼波撼其東陽江遶其北襟帶兩
水潭縮其轂弭權登臯巖門在焉巖自南入
稍深詰曲可七八丈倚山南望見濼挾陽江
與彈丸南溪諸水澔漾長邁瀾縈灘迅縹綠

天際紛紛然欲起即攬雲於蒼梧觀濤於南海也有宋諸公當日宴集禊亭青羅閣今皆不知所在近得僧粗營菴居鐘磬餘音適與水石蕭寥之響相答亦堪清聽乃山北危崖佛閣半野酒亭非不據勝互列巖表然巖壁無一舊刻豈昔人遊覽有未及哉毋亦以閣則迫山院陝亭則對岸喧囂自昔已然矣

虞衡志云雉巖下濱江獨山有小洞洞門下臨灘江

詩

宋黃照 為愛空門息世機儒衣不着着僧衣淵魚林鳥已聞法更待當年瑞雉歸

長老月公乃興國八年狀元王公之族子章峴 偶投雉巖宿洞穴窮尋顏旁通赤明天南極地所震更登雲外頂下視江之灣群山無我咲畏汝碧玉環我又墮塵網歲暎吟良難

又自龍隱巖泛舟至雉山 晴溪幾曲度澄

灣朝涉龍巖晚雉山林叟野僧休笑我平生
所得是官閑

鄒浩 客睡當年記雉山杜鵑聲切枕難支
今朝歸向山頭過不見杜鵑空夢殘

尚用之留題 座下聞經本至誠改頭易面
悟前身信知大道無難事一念真如雉化人

提點錢事蔡瑗留題雉山院

白雉聞經向此山轉身來伴老僧聞大都見
善能開悟天上人間任往還

孫覲青蘿閣 蠻村避地已三年過寺尋僧

半日閑小樹吹香花漠漠斷崖漱碧水潺潺

枕柳葉底秋聲滿栢子烟中午夢還便擬買

舟隨釣叟一簑烟雨繫蒼灣

張栻楔亭 一曲清江正可憐隔江新竹露

涓涓好風成我曲肱夢起看飛雲度碧天

題名

轉運使屯田外郎蘇安世與進士趙揚來遊
并男台文祥文炳文彥文侍行乙未三月廿



原件短缺

P4

三日

大宋治平元年臘後一日運判孔延之具舟
按部因率通判范子明機宜姚原道知龔州
丁錞飲餞于雉山提刑余藻書巖石以紀

武陵張頡仲舉甬上苗時中子居洛陽劉宗
傑唐輔吳興劉頴宜父七月自真山來遊元
豐元年八月初

轉運使朝散大夫直集賢院陳倩權提點刑
獄奉議郎彭次雲權提舉常平奉議郎

東都程建子立崇寧甲申清明前一日挈家
遊男徹術衍侍行

鄱陽程欽之率龍舒劉成之汝陽梁晦叔淄
川范貴之臨川徐伯應鄱陽萬彥亨劉長孺
南康范少房南海張守道同游雉山男昇侍
大觀戊子九月望日

張子修農子源王君錫宋義夫何由道張方
仲侯伯壽出餞於此大觀庚寅九月廿一日
刻首有關文

政和二年三月廿七日南郡唐晉德携家遊
錫銖銓錫侍行

建安謝勳信都李温占原田永年長沙裴曉
廣陵楚執規淮海楊書思政和癸巳孟春晦
日同來

端臣適用聯襍凌顥景款幽叢岑然吸酪奴
為無方遊維摩丈室盖自生白政和丙申季
秋次朔

杜賢萬劉資中張方仲自龍隱過雉山政和

三年三月廿日

清湘唐孝稱宗舉開封劉若愚惠夫若水幾
道乘暇登永寧閣復飯雉山紹興丙申重九
日

元壽携家來丙寅仲春十有四日

肥鄉胡彥温以職事約束提鹽會議蒼梧桐
廬詹體仁招三山熊景瞻飲錢於雉山之禊
亭雨餘江山如洗樽俎無復暑氣檢校陳迹
一別盖六年矣縱步巖广景物尤勝勸酬歡

甚豈偶來還勝於特來耶淳熙十有一年夏
五月甲寅

莆田李子凝甲戌九月廿八日東還刑使檢
詳錢別於此

豫章李大異帥桂之三年勸農於廣壽寺是
日春和景明天氣清淑因從容禊亭遍觀前
賢鐫刻過午而歸通判翟吁胡槻臨桂令斛
邁偕來嘉泰改元仲春望日
劉晞書雉岳兩大字晞即里人隱居辰山者

灘山人曰雉之盛在宋世士大夫輕舟便輿
望巖至止夫豈有栖霞之奇與龍隱之廣坦
哉良以近峙郭南不煩遠策下當江澨且可
臨泛況介居諸山之中東西馳騫指顧最便
又是時合浦朱崖舉隸部內漕司憲使歲中
按行往返多南道出祖入勞假茲成禮不然
豈慕白雉而來耶經不東傳雉不南化山不
知作何名可發一粲十餘年前斯巖莫傳焉
非以亭館既殘巖栖無庇主者棄如遺迹遊

侶因而斷轍我無足慨者惟士大夫所題名
昔本賢豪今餘文字就壁按視一值其人如
蘇轉運之高義乎低回其下必不忍去竊慨
夫把翰舊區行觴餘址衣冠所萃丘墓是業
乃何地不可歸骨獨與是山爭尺寸之土甚
無謂也飭以厲禁使人不侵其惟賢府公明
令君乎

桂勝第三卷

桂勝第四卷

南溪山

從閩雞山北水口入是為南溪山以溪名諸
峰迴合四壁峭懸烟翠黝蒼著衣如染唐李
公渤愛其映帶溪流特於玄巖白龍多所穿
築白龍之前溪水澄碧中有泉出是為新泉
亦公之所鑿自殫精思製序綴詩及去桂之
際留題致意後或改玄巖曰觀音轉玄巖而
上有巖曰泗川自僧人巖居者取所奉彼教

內兩大士號之至宋東南諸巖始以郡人劉仲遠學道其中名其上巖曰劉仙下則穿雲緣穿雲東北行以有仲遠足迹名曰仙迹劉仙之旁閣出巖際名曰通明其前有道觀長松落落據牀小憇頗有蕭疎之狀然似不若白龍玄巖俯映寒漪流靚芳藻花猶池植鳥似家禽隔水茆居砧杵間發不知身在葦蕩之野也已

虞衡志云白龍洞在南溪平地半山中翕有大石屋由屋右壁入洞行半途有小石室劉仙巖在白龍洞之陽仙人劉仲遠所居也石室高廣出半山間

詩

唐李渤題玄巖 玄巖麗南溪新泉發幽色巖泉孕靈秀雲烟粉崖壁斜峯信天棹竒洞固神闢窈窕去未窮環迴勢難極玉池似無水玄井昏不測仙戶掩復開乳膏凝史滴丹砂有遺址石徑無留跡南眺蒼梧雲北望洞

庭客蕭條風烟外爽朗形神寂若值浮丘翁
從此謝塵役

宋呂愿忠 翠峯倚空蹲怪石輪囷夾道卧
長松白龍應已冲天去巖竇巋然有故蹤

假守呂叔恭拉機宜劉子思監郡朱國輔
經屬陳朝彥自中隱巖過白龍洞叔恭之
子大鈞侍行紹興甲戌季春之七日

朱晞顏 慶元改元寒食日陪都運寺丞遊
白龍洞時牡丹盛開小酌巖下夕陽西度並

轡而歸

小溪漱碧響潺潺路入龍宮杳靄間佳節謾
添新白髮故人賴有舊青山花時幾共湘南
醉萍跡何當嶺北還歸路聯鑣紅日晚多慙
龍卧白雲閑

胡寺丞和 懸崖怪石水潺潺宜有神龍隱
此間窮勝不妨歸險洞尋春那止看羣山攀
龍行即天邊去躍馬聊同野外還好景良辰
適相會一尊且共水雲閑

曾宏正 老仙乘白龍飛入白雲鄉巖前刻
舟痕遊子常彷徨清商韻風松疑有笙鶴翔
我欲往從之居然塵鞅韉酒闌下山去回首
空慨慷

臨江曾宏正淳祐癸卯閏望同三山常挺
臨川吳湜羽士李可道來遊子公邁侍

李曾伯 老龍昔未蛻嘗蟄此山中霖雨春
疇足風雲夜壑空兩崖高下倚一徑往來通
不願千金劑惟祈百穀豐

淳祐庚戌覃懷李曾伯因勸農來此得四
十字是日微風扇和輕雲閣雨千峰翠滴
四野綠秀枝禽對語春意駘蕩無極徜徉
久之緩轡而去賓佐四明史偉之廬陵曾
垓眉山楊埏東嘉林拾三山卓炎子廬陵
王真孫長沙胡盛盱江周子榮潼川楊牧
之清湘滕處厚續至

文

唐李渤玄巖序 桂水灘山右匯陽江數里

餘得南溪口溪左屏外崖巘闐麗爭高其孕
翠曳烟邈迤如畫左連幽野園田雞犬疑非
人間沂流數百步上巖巖下有灣壤沮洳因
導為新泉山有一洞九室西南曰白龍洞橫
透巽維蛻骨如玉西北曰玄巖洞曲通坎隅
晴眺瀰水玄巖之上曰丹室白龍之右曰夕
室巽維北梯險至仙窟比又有石室參差砢
豁延景宿雲其洞室並乳溜凝化詭勢竒狀
俯而察之如傘如輦如藥櫃支撐如蓮蔓藻
井左睨右瞰似簾似幃似松偃竹裊似海蕩
雲驚其玉池玄井嵐飈迴環交錯迷不可紀
從夕室梁溪向郭四里而近去松衢二百步
而遙余獲之若獲荆璆與隋珠焉亦疑夫大
舜遊此而忘歸矣遂命發潛蔽深磴危宅既
翼之以亭榭又韻之以松竹似讌方丈似昇
瑤臺麗如也暢如也以溪在郡之南因目為
南溪兼賦詩以紀之寶曆三年三月七日序
郭顯卜居銘 皇宋開國幾二百年金虜犯

順衣冠南遷桂獨宜人歲無嵐煙溪山之勝
間出神仙泌源郭顯志慕精專卜築巖下鑿
井耕田榜楫歸去養真自然燒煉丹藥徜徉
林泉峩峩蘚壁排空插天紹興己巳勒銘記
焉 栖霞子書

題名

白龍山在桂城之東南登山之西而至其洞
深廣可數楹石之穹隆隱然若神物化去而
留其跡洞之名蓋亦舊矣元祐己巳二月八
日上黨苗子居歷陽高時仲金陵李師正黎
陽吉鄰幾乘暇以遊愛其佳趣且忘其歸因
刻於石以志其來爾會稽關蔚宗題

上饒盧潛禮濟北段徵之毘陵胡茂方同郡
樓元弼武夷葉振卿紹聖乙亥秋九月中泮
遊

湘陰彭子民陶逵王長孺洛陽席貢從詔使
按部還桂同遊白龍洞己卯春

公輔公密侍親遊春來此政和辛卯季春旬

休日

南郡唐晉德携家同遊男鋼銖銓錫侍行政
和二年三月二十七日題

李景言王子舉渭之昭淳熙丙申立夏日同
遊

陳正仲銓訖之官王景醇林亨仲飲餞於乙
卯仲冬

慶元丁巳立秋後三日同幕集觴於此豫章
王岳次山溫陵趙庚叔初長沙陳克仁壽卿

長樂陳昂中定謨臨川楊文明仲藻

慶亭翟子埜歲在庚申重五休務日携家往
尋巖洞之勝時也暑風清微涼氣襲人徜徉
終日不知夕陽之在山也

長沙李勁正臣胡持正雅叔唐嶸次山朱佐
君輔蕭仲仁元之嘉定甲子端陽日憇此

嘉定辛未中元後四日計臺臨汀楊公子直
復出按未厯之郡憲臺括蒼管定夫帥守濟
北李誠之載酒白龍洞留款先是去夏六月

大暑公初行郡亦嘗觴此夫仕而南多鄙夷
其民怠忽廼職使者間畏炎毒未嘗一跡按
部公連歲犯暑殆遍走二十四州尊年精明
人所難及父老有迎拜而問者曰使家壯也
何用而見用於遲晚近也弗留而肯留於遠
外吾儕嶺民懷私惠而勤勞使家一至於斯
公呼而謝之曰上有命老弗容辭遠弗敢憚
懼我之矜汝者或有未至而汝之憐我者姑
置勿言遂一咲登車既行勒茲語於巖石用

告我同志云

東萊呂祖昇長沙王濟美自千山觀聯騎來遊

嘉熙初元正月三日

南溪山三篆字

玄巖洞三隸字

觀音巖三真字

劉仙巖

宋李師中留題大空子隱居 可道非常道
真空本不空荒郊自生草閑地又栽松無欲
更何慮有為終必窮風雲上天去老子信猶

龍

曹輔遊劉道人巖 故老能將舊事傳
仙翁蹤跡尚依然 方知物外壺中景
隱隱烟霞有

洞天

梁子美和 神仙靈異古今傳
窮理修真本自然 遺址宛存疑谷口
蒼崖喬木聳青天

呂愿忠 平湖小隊出郊墟
盡日登臨據隼旟 聞道仙人尸假去
尚應猶學世間書

假守呂叔恭拉機宜劉子思監郡朱國輔

經屬陳朝彥紹興甲戌季春七日來遊

趙夔桂山諸巖歌 秦皇開郡為桂林
古號

名邦五嶺陰山琢玉簋攢萬疊江分羅帶繞

千尋青青四顧列羣山生自天工巧若鑿玲

瓏拔地聳層秀崢嶸嵯峨星斗間其中有巖

十二所伏波靈顯存祠宇顏公讀書窟室中

疊綵北山如列布何年龍隱冲霄去鱗鬣形

模鑿石路仙人劉公飛升時巖壁宛然遺舊

題穿雲仙跡次左右

虛道氣多南溪白雉聽經生人類蕭寺豐碑
有元記信知一性無不通石竇陰陽苔蘚蒙
西南中隱尤勝絕穿處得名因呂公曾公程
公皆舊跡遺愛在民傳古昔沉沉巖谷有餘
光炎方勝槩神難藏週迴不遠郭郭下輪蹄
追賞何忙忙

又桂山諸洞歌

宜人之地少陵詩閱玩前

賢詞意奇爛然五詠非虛語位壓坤方占一
維青青四顧列羣山生自天工巧若鐸玲瓏
板地聳層秀崢嶸嵯峨星斗間其中有洞十
二所七星山下栖霞府日月華君顯跡靈遇
者當時鄭冠卿歸到人間已三載仙洞光陰
時未改至今舊記傳無窮玄巖蟠蟄聞白龍
一泓澄碧寒潭瑩水月圓明下翠峰枕城樓
觀環俯視綠鎖喬林春日媚秦碑柳記已難
觀灘水南流泛渺漫慶林巽穴玄風出華景
高明隱丹室西方虛秀貫山腰南華朝陽風
景饒夕陽北牖通仙徑白雀嘉蓮池淥淨許

多佳致卒難題留與詞人賡雅詠

漳川先生徧遊諸景故作是歌以總之紹
興甲戌中秋南溪郭顯勒石穿雲巖將仕

郎劉振書

張孝祥劉真人贊 河目甚口須髯怒張人
貌而天者耶其骨已朽其人不死與天地齊
年者耶山高谷深變化成空一咲相從惟我
與公 乙酉十月朔書付巖中道士文道華
使刻之石

題名

晉陽路質夫桐廬方務德紹興己巳二月十

四日同來住巖道民郭顯勒石

提點刑獄公事延平張維經畧安撫使歷陽

張孝祥以

會慶節祝雲壽於西山資慶

寺飯已登超然亭遂遊中隱巖白龍洞劉公

巖以歸客長樂鄭顥江文叔吳鎰俱來乾道

元年九月二十二日

嘉定癸酉先瑞慶節之一日經畧安撫管湛

提點刑獄方信孺轉運判官陳孔碩既蘄句
萬壽於道釋宮因探洞過劉仙巖是日秋色
澄霽

穿雲仙跡兩巖各有三楷書題巖名

灑山人曰白龍玄巖其序與詩體氣高妙頃
於郡志復得一銘云李公所為銘曰桂之有
山潛靈億年狀如騰雲戟列劍攢巖之有洞
窈窕鬱盤虎掛龍懸形狀萬端旁馳杳冥仰
踏噴坑玉落磬墜幽聲畫寒巴陵地小別有

洞天文籍之困吾何有焉酒一卮兮琴一曲
玄巖之下可以窮年毋論此銘是否出公手
匡廬二室皆有公隱迹不彼之思而此是美
雖謂為嵩廬之匹可也山勝以人人勝以名
風操文雅高世如公是謂不朽南溪隱山何
其幸哉長有公也劉先生果能乘龍跨鳳遊
戲雲間與方下視世以為埃濁何有於一山
金堂玉室乃其高蹈紫書赤文寔彼玄秘則
巖鑄金液還丹金玄之歌與夫張平叔之贈

皆刺語已又何有於他趙賢良贈余先生歐陽
晦夫記唐少卿事舉不敢錄非曰毀之直以未
游其藩故爾李公師中有種竹記特為戰具設
呂公渭傳劉先生養氣湯方之二者治戎惠民
儻最要乎則余志山者非山所豫亦毋庸志之矣
頃得元志乃知此銘渤仲兄涉所製郡新志謬以
為渤而余不之改抑以見日者攬筆時設疑非妄
新志之不可盡信此其一也庚寅仲春灘山人識

桂勝第四卷

卷之三